

En memoria da

Calist Berther-Zortea, Landquart

(Corr.) Calist Berther ei naschius a Camischolas/Tujetsch ils 7 da zercladur 1921 el ravugl dalla gronda famiglia da mistral Vigeli Berther-Flury, enconuschents muort siu dun natural per giustia e sia clara devisa visavi ils fatgs publics. En quei ambient – sut la prudenta egida da mumma Martha – ha Calist Berther retschiert ina educaziun cristiana cul spért da partner e segidar da pign ensi. Suenter haver frequentau la primara e la secundara – ed aunc la scola da purs – collavura Calist Berther el menaschi dils geniturs. El veva ina buna basa e streh vid las lavurs da pver e sil funs. Oravontut fuva el in sitgur da vaglia, quei che muntava da gliez temps in talent impurtont, cu tut vegneva segau a maun. Ils geniturs fuvan leds digl agid, pertgei da lezzas uras era enzatgi adina pli u meins en survetsch dalla patria.

Suenter l'uiara sei spert semussau ch'il tschespet muntagnard po dar existenza mo a paucs d'ina gronda famiglia. A Calist Berther ed ad autters ha ei tuccau da serender ella basa e da far leu il daviver. Gl'emprem sepladescha el a Baden tier la BBC ed empren da rudien da sesurvir da maschinas a motor. Tschun onns pli tard entscheiva el – sco um dil fatg – tier la Vialier Retica a Landquart. Cheu selavura el siado ad in mistergner renconuschiu e beinvesiu da conlurrs e patrun. El lai buca per breigia e fa duront onns cuors da perfecziun ella branscha da reparaturas vid locomotivas. Varga trent'onns ha el surviu attaschadamein alla Vialier Retica, quella ovra impurtonta per igl entir Cantun.

A Landquart ei Calist Berther spert staus da casa, e cheu eis el secasaus per adina. Igl onn 1954 marida el la giuvna Maria Zortea, ina buna dunna e mumma. La lètg ei stada benedida da tschun affons. Il Calist Berther fuva in bien e beinvulcent bab che ha mess a disposiziun sias meglieras forzas per dar als affons ina buna educa-



ziun ed il fundament per stupentas clamadas. El ei adina staus dalla tenuta dils principis da sia derivonza. Calist Berther era denton buca igl um da gronds plaids. Tgi che ha enconuschiu el vegn ad attestar ch'el fuva in um honzeli e da bien plaid e fatg. El veva humor. Da siu esser sorteava cumentientscha. Lavor e cardientscha fuvan per el enzatgei che secapeva da sesez. Il pli bugen passentava el siu temps egl ambient dalla famiglia ed uras en siu curtgin, ch'el cultivava cun plascher.

Il Calist Berther-Zortea vegn perquei a muncar fetg alla famiglia ed a tuts parents ed enconuschents. Morts ils 19 d'avrel 1983, ha el – tenor giudicar human – stuiu bandunar memia baul quei mund. El vegn ussa a selegrar culs geniturs ed ils siat fargliuns gia trapassai en onns da giuventetgna, ni stend amiez la veta. La famiglia da mistral Vigeli Berther-Flury ei enconuschentamein buca stada schangiada da fridas dil destin. La cardientscha dat forza. Che las famiglias dil defunct Calist Berther-Zortea possien purtar la sort. El rauassi en pasch.